



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 3 Yangia anidakangma : Tir Yimym tiryimym@aolima tir yimym TAPAK 8

Kobi melii India nunger itai atutsü: PM Modi

United Cup nung Djokovic-i shilem agitsü, Nadal masayatetsü



VOL. XXI NO. 14 (ADOK 14) DIMAPUR KÜPTOKNÜ (SATURDAY) MONGPUTENI (OCTOBER) 21, 2023 ₹ 5.00

Dr. Shurhodelie-i active politics nungi anener Kohima, October 20, 2023

(TYO): Dr. Shurhodelie Liezietsu-i küm 50 tema politics nung shilem agia arur NPF Tir menden toktütsü telemetba agiogo.

An tebong maitsü amshiba regional political party UDF nungi NPF tashi Dr. Shurhodelie-i shilem agia arur.

Nagaland Peoples' Convention (NPC) nungi Nagaland Peoples' Front melenba mapang nungi tenzüker Naga People's Front (NPF) ta melenshi tashi arishi küm 87 tain Dr. Shurhodelie-i küm 20 jungnüa Tir inyaka arur.

October 21 nü Capital Cultural Hall nung 61 buba Foundation Day amongdang pai Tir menden toktütsü osang sangoktsütsü.

Dr. Shurhodelie-i 1969 küm United Democratic Front nung züngsem kümer inyaka aruogo.

“Onoki kanga meima aliba Tir Dr. Shurhodelie Liezietsu-i active politics aser party nungi anentsüba ya party züngsem ajak temulung shirangba mapang ka lir. Pai Ura Academy tenzütsü atema active politics nung shilem magisü lemtet” ta Hokolbarnü NPF secretary general Achumbemo Kikon-i osangbener dang ashi.

Achumbemo-isa party züngsem ajak tenüng nung Dr. Shurhodelie dang pa lenisüba atema pelaba metetdaksü.

Tang teinyakdak NPF ketdangpurtem küm ka jelia mapa nungi anentsü aser asüng ketdangpur tasen tenüngtem metetdaksütsü, ta paisa ashi.

Osang angazükba agi tang teinyakdak NPF Working President Apong Pongener-i Tir menden melenzüktsü akok.

NCSB Ltd-i aluyimertem aser entrepreneurs maneni yaritsüla Dimapur, October 20, 2023

(TYO): Nagaland State Cooperative Bank (NSCB) Limited-i nübertem nem senotsü teyari agüja yariba ya kanga tongtipang ta Additional Chief Secretary & Finance Commissioner, Sentiyaner Imchen-i ashi.

“Cooperative bank ka ama nenoki aluyimer aser entrepreneurs yaritsüla. Cooperative bank ajanga yimtsüngtem nung alirtem yariba nung tongti shilem agir aser state nung mapa adoka aser nübertem pei taküm mesütetsüsa bank-i rongsenketzüng renlokba nung shilem agitsüla” ta pai ashi.

Sentiyaner Imchen ya NSCB Chairman lir aser Hokolbarnü NSCB conference hall Dimapur nung 54 buba NSCB Limited lokti senden amandang pai iba onük jembi.

“Küm ka tsüngda NSCB bank 4.20 % inlokogo. Ibaji March 31, 2022 nung Rs. 1,66,901.48 lakh aliba nungi March 31, 2023 tashi nung Rs. 1,73,918.98 lakh akümba lir. March 31, 2022 tashi bank nung deposits Rs. 100606.05 lakh liasü aser March

31, 2023 tashi nung Rs. 104909.14 lakh kümogo, ibaji 4.28% inlokba lir” ta Sentiyaner-isa ashi.

“Ajisüaka NSCB bank indang loan recovery majung kechiyong bank indang Non-Performing Asset (NPA) ji 15.98% lir” ta paisa shisem.

“NPA jenjang aika asüba ya bank atema lendong lir anungji sendaktepa alir ajaki NSCB yaritsü aser RBI o NABARD ajanga credit risk management kübok mily 5% lateta aliba tashi NPA ajemtsü mepishir” ta paisa metetdaksü.

“Financial inclusion nung asenoki nisung ajak dendaksütsü merangtsüla aser nisung ajak nem bank tajangzük agütsütsüla” ta Sentiyaner-isa ayongzük.

Iba senden nung annual report, auditors aser budget report agizük aser SHGs, Cooperative societies o MPCs tajungtiba nem sempettem agütsü.

Maneni, Board of Directors nung züngsem tasen asem- Zandi Domta (Peren), Wepe Ritse (Phek) aser C Yanchumung Chang (Tuensang) nunger shimok.

43-Tapi by-election atema nomination süogo Mon, October 20, 2023

(DIPR): 43-Tapi Assembly Constituency by-election atema Nationalist Democratic Progressive Party (NDPP) aser Indian National Congress (INC) candidate anati nomination papers agütsüogo.

October 19, 2023 nü NDPP candidate Wangpang Konyak aser INC candidate Wanglem Konyak nati Mon Deputy Commissioner Office nung tenüng agütsüogo.

Sub Divisional Officer (Civil) aser by-election atema Returning Officer Rongsenmenla lenisüba kübok iba maparen inyaka liasü Sorkari “Paid Holiday”

agütsür: Külen, Nagaland sorkari 43-Tapi (ST) Assembly Constituency by-election anogo “Paid Holiday” ta sangdongogo.

Iba Constituency nung alirtem election maparen nung shilem agitetsüsa atema sodi agütsür, ta Home Department-i sangdong ka nung metetdaksüogo.

“Tapi (ST) Constituency nung voter ta tenüng zülüoka alir saka Constituency nungi pilar alirtem iba tetuyuba kübok adener. Ajisüaka lendong mesüra takoksa ajurutsüsa mapa inyakerambo iba tetuyuba kübok medensemer” ta Home Department-isa metetdaksü.

Nagaland Civil Service Association mungdang among



Dimapur, October 20, 2023

(TYO): October 20, 2023 nü Niathu Resort, Chumoukedima nung Nagaland Civil Service Association 46 buba lokti mungdang mongogo.

Iba sentong nung Nagaland Legislative Assembly Speaker Sharingain Longkumer-i alakmeta jaoker ka ama shilem agi.

Speaker Sharingain-i o jembidang NCS (Nagaland Civil Service) ketdangsürtemi pei wadang nung tajungtiba inyaksü ayongzük.

“State ka nung civil servants ajanga pei sensotem tiptema alitsü atema inyaker. Ketdangsürtem ama nenoki sorkar tenüng nung noktaker anungji nenoki kübok inyakerkem tim lenmang nung

anitsüla” paisa ashi.

“Nagaland nung sorkar ketdangsübaren teküpoktiba jenjang nung lua inyaker aser iba asoshi district o yimtsüngtemi senotsü aika lemezük. NCS ketdangsürtemi yimtsüng unng alirtem rongsenketzüng jenjang tajungba akümtsüsa aser azükarua alitsüsa len anitsüla” ta paisa shisem.

NCS ketdangsürtemi wadang balala nung aika ajangshia arua lir anungji nenoki sorkar policy nung metokmeperi alibatem reprangshimtsüla aser tajungtiba ketdangsüa aotsü atema shisatsü agütsütsüla, ta NLA Speaker-isa ayongzük.

“NCS ketdangsürtem ya state government laws aser policies mapa kuma inyakerkem

lir. Nenoki lokti nung temelenshi bener arur aser rongsenketzüng renloker” ta Chief Secretary J. Alam-ia ashi.

“Tayongzükba balala ajurua inyaka arur aser nisung taküm nung temelenshi adokdaksüba ketdangsür ajak nem tenüngsang agütsür” ta pai ashi.

NCSA 46 buba lokti mungdang nungsa interactive aser business sessions agi aser iba nung Advisor to the Chief Minister Abu Metha-i alakmeta jaoker ka ama shilem agia liasü.

Iba mungdang nungsa 2 buba NCSA singing competition aser iba sentong nung alakmeta jaokerji Commissioner & Secretary Kevekha Kevin, Zehol, NCS liasü.

Chuchuyimlang dang mezüngbuba HiEERA Village ta ajar



Dimapur, October 20, 2023

(TYO): Chuchuyimlang ya India nung mezüngbuba Empretec-HiEERA village ta sangoktsüogo aser iba indang kulikaket ka Chuchuyimlang Village Council Chairman nem agütsüogo.

Chuchuyimlang VC Chairman Ao Sanen Pongen lenisüba kübok Chuchuyimlang-i United Nations Sustainable Development Goals 2030 tongtetsüsa inyaktetba atema Empretec-HiEERA Methodology aser United Nations Conference on Trade and Development (UNCTAD) ajanga iba naroküm agütsüogo ta sangdong ka nung metetdaksü.

October 19, 2023 nü Abu Dhabi nung 8 buba World Investment Forum (WIF) sentong nung Chairman Ao Sanen Pongen nem recognition certificate agütsü.

Small Industries Development Bank of India Chief General Manager Dr Subhransu Sekhar

Acharya aser Empretec India Foundation National Director Arnab Chakraborty nati iba kulikaket agüja liasü.

World Investment Forum ya küm ana nung khen amonger aser taküm Forum nung Nagaland nungia nisung tenet oa shilem agir. Parnokji Sanen Pongen, Dr Patu K Zeliang, Paul Lokhu, Alemjungla Jamir, Caroline Sahnarnai Paul, Wangshikokla Jamir aser Lieut Col Joy Choudhury (Veteran) nunger lir.

Taküm WIF nung alima tesem balala nungi teshimtet nübok 8000 shi adener.

Empretec India Foundation-i Department of Industries and Commerce, Government of Nagaland aser Small Industries Development Bank of India den yaritepa Nagaland nungi teshimtet nübo tenet anir oa amonger.

Teshimtet nübo tenet rongnung Chuchuyimlang Village

Council Chairman Ao Sanen Pongen lir. Pa ya entrepreneur ka lir aser aser Empretec India Foundation nunga Senior Advisor inyaker.

Paul Lokho ya 1980s nungi North Eastern Region nung NGO tenzüker rongnung ka lir. ADB aser World Bank nung pai temelenshi aika bener aruogo aser tang pai Youth Entrepreneurship Development nung shilem agi. Pa ya Empretec India Foundation nung Senior Advisor lir.

Alemjungla Jamir ya Women Entrepreneurship Network Nagaland (WENN) nung Chairwoman aser Naga Bowl kibur lir.

Dr Patu K. Zeliang ya agri extension personnel ka lir aser pa ICAR KVK Peren nung inyaker.

Lieut Col Joy Choudhury ya Zila Sainik Board, Mokokchung Secretary lir aser Mokokchung, Longleng, Tuensang, Noklak o Shamator district tem nunga Ex Service Men (ESM) nung inyaker. Pa ya Empretec Philosophy nung inyaker aser UNCTAD Empretec Complexes of Eco Systems len anir inyaka arur.

Caroline Sahnarnai Paul ya Tribal Spun and House of Twiss founder lir aser la ya mozü mamshii süngolu ayimer ka lir.

Wangshikokla Jamir ya International Institute of Medical Research Centre founder, social worker aser entrepreneur ka lir. La ya Molungs Women and Child Welfare Society chief functionary lir.

Samagra Shiksha ajanga SEAS 2023 training agütsü



Kohima, Mongputeni/Oct. 20 (TYO): Samagra Shiksha Nagaland ajanga District/Block level functionaries atema State Education Achievement Survey (SEAS) 2023 indang training ka Capital Convention Centre, Kohima nung Hokulbarnü ayongzüka liasü.

Iba survey atema master trainers tem den jembidang Commissioner & Secretary School Education aser SCERT, Kevileno Angami-i ashiba agi, state nung school education system nung tashidak aliba SEAS ajanga putettsü.

Iba survey yagi school 1643 ayimjemtsü aser yangji government school 805, private school 800 aser central school 38 alitsü, ta lai ashi aser sample school tem nungi classes 3, 6 & 9 nung azünger temi angazükba asadangtsü ta ashi.

Iba survey nung awajemba school ya Nagaland nung aliba school tem nungi shilem 60 alitsü aser kaketshir shilem 39 awajemtsü, ta lai ashi.

Sample survey agiba ya state nung school education healt tuluba aser timba nung lir,

anungji master trainers temi iba ya ajanga state nung education indang health tsütsü performance grading index nung kongshitsü ta meteta alitsü ta shi.

Iba survey nung bushitetba nungi state nung education system takzütettsü, ta lai ashi.

Field investigators indang trainers ama shisa agütsür atema policy yangluba nung tongti shilem agitsü. Iba suryev ajanga education system indang health sayutsü aser school nung aginüba ama kaketshir temi angazüker asü masüar jangjatsü, ta Angami-i ashi.

Tarutsü nung mera agitsü atema ibai policy yanglur aser educators asoshi tamendak dak data aser osangtsüsang alitsü ta lai ashi.

PARAKH-NCERT ajanga ayongzüka SEAS 2023 ya November 3 nü linük tesem ajunga nung agia grades 3, 6 aser 9 nung asen chirtemi anagzüka asadangtsü, ta Joint Mission Director, Samagra Shiksha, Nagaland, Dr. Bijano Murry-i ashi.

SEAS ya 2014 nunga agia

liasü saka follow up nung temolung magütsü, anungji tain SEAS 2023 ya ajanga state-i follow up mera shidak agitsü imlar, ta lai ashi.

Iba maparen asoshi district aser block coordinators 112 shim aser Field Investigators 1810 jangjaogo aser parnoki kaketshir tendangba nung yaritsü, ta Murry-i ashi.

Iba sentong ya NEP 2020 nung shia lir, foundational stage nung class 3, preparatory stage tatem class 6 asr middle mesüra elementary stage tatem class 9 alitsü, ta lai metetdaksü.

Planning, research, implementation, monitoring aser tesayur aser kaketshir nem academic tsütsü teyari agütsüba nung SCERT aser DIETS, NBSE, Department of School Education aser Samagra Shiksha lungjemer inyaksü nüngdaker, ta laisa ashi.

Iba sentong nung menden ya Deputy Mission Director Samagra Shiksha liasü asr iba sülen technical sessions, filling of OMR, sampling procedure aser hadir agütsüba sentong agia liasü.

Eri Seed Grainage Management Training tenzükogo



Dimapur, Mongputeni/Oct. 20 (TYO): Eri Seed Grainage Management Training Program tenzükba sentong ka October 18, 2023 nü State Sericulture Farmers' Training Centre, Dhansiripar, Chümoukedima nung agia liasü.

Anogo tenet residential training sentong ya Department of Sericulture ajanga ayongzüker aser ibai Department Field Staff aser jurila alu ayimertem asoshi lir.

Iba training sentong nung Mon, Longleng, Tuensang, Zunheboto, Shamator, Noklak, Chümoukedima, aser Dimapur densema district balala nungi nisung 30-i shilem agitar.

Iba training nükjidong ya shilem agir nem scientific technology amshia tashidak maliba eri mesen metsüdaksütsü asoshi lir.

Iba training tenzükba sentong nung CSB nung Consultant, Dr. B.K. Singh-i Eri Seed Grainage Management Training Program indang nükjidong rateta ashi.

Mhathung Kikon, Director ajanga Standard Operation Procedure for Eri Grainage Management Training indang course materials sayatsü aser ano eri silkworm production tajungba kumdaksütsü asoshi training module yangluba atema Dr. B.K. Singh nem tenüngsang

agüja liasü aser temolung agüja training nung dener tarutsü nung pei poksünga alitsüsa inyaksü ayongzüker.

Sericulture farming community tenüng nung Tammong village, Mon nungi Lihnon, Sastimi village, Zunheboto nungi Kinito T. Kini nungeria iba sentong nung jembia liasü.

Iba sentong nung menden Ngoiang Ongh, E.O. SSFTC, Dhansiripar liasü, M. Meyase, Deputy Director ajanga tarur pela agizükba o jembia aser Mayangjhala Walling, District Sericulture Officer, Chümoukedima ajanga melepzüng o jembia liasü.

NLA bye-election atema INC-i Star Campaigner tenüng sangdong

Dimapur, Mongputeni/Oct. 20 (TYO): 43 Tapi Assembly Constituency nungi Nagaland Legislative Assembly atema November 7, 2023 nü bye-election agitsü aliba dak sendakba nung Indian National Congress ajanga Star Campaigners tenüng sangdongogo.

43 Tapi AC atema bye-election asoshi nübu yima jajatsüpurji Mukul Wasnik, V. Lasuh, Jairam Ramesh, W. Akum, Dr. Ajoy Kumar, Shaboh Konyak, S. Supongmeren Jamir, Gaurav Gogoi, L Chuba Yim, Mohan Prakash, Er. T.Thomas Konyak, Sudeep Roy

Barman, Er. Meshenlo Kath, Supriya Shrinete, N. Yongyo Konyak, Pawan Khera, Akumla Pongen, Bhupen Kr. Borah, Lima Lemtur, Francisco Sardinha, X.Chophika Sumi, Birajit Sinha, Atsala Anar, Pradyut Bordoloi, Akong Phom, Abdul Khaleque, Neojila, Sanjay Dutt, Imkongmeren Jamir, Sankar Malakar, Ketseivie, Khriedi Theunüo, Akuonuo Mechio, Capt. G.K. Zhimomi aser Ranajit Mukherjee nungertem alitsü, ta Tariq Anwar, General Secretary, INC ajanga sangdong ka nung ashi.

NITI Dimapur aser Chümoukedima nung Puja sodi alitsü

Dimapur, Mongputeni/Oct. 20 (TYO): Durga Puja benjongmung tenüng nung NITI (Nationalist Institute of Technology & Innovation) Dimapur & Chümoukedima Centers tem October 21 nungi 24, 2023 tashi class magitsü, ta NITI Dimapur Center indang

Director, Ajay Sethi-i sangdong ka ajanga ashi. Center anaprong ya Bodhbarnü (October 25) nungi lapoktsü. Nübur ajunga dangi tepela Puja aser Dussehra benjong salem abener, ta sangdong ajanga ashi.

Nagaland Police ajanga temesepba mozü aser yi apu

Dimapur, Mongputeni/Oct. 20 (TYO): Nagaland state kübok district ajunga nung synthetic drugs and psychotropic substances aser IMFL (Indian Made Foreign Liquor) peria anguba tebilemtsü koktettsü mechi Nagaland Police-i maneni Statewide Operations agia arudar.

Iba ama temesepba mozü aser yi shibelena ayokba aser achi-ajemba nokdangtsü mechi tari tem meita aor (MVCP), hotels, restaurants amala meita aor. Yamaji September 1, 2023 nungi October 15, 2023 tsüngta temesepba mozü aser yi yamai apu:

Sl No.	Particulars	Case Registered	No. of persons arrested	Seizure (Qty)	
1.	Narcotics & Psychotropic Substances	36	66	Spasmo Proxylon & other tablets	8005nos
				Brown sugar & Crystal Meth	5778.71g rams
				Heroin	213.53
2.	IMFL	15	16	1659 nos & 199.15 litres	
3.	Arms & Ammunition	6	8	19 nos	
Total		57	90		
No. of raids conducted/search/MVCP: Raids - 136					
MVCP - 6776					

Maneni Nagaland Police ajanga nüburtem dang Narcotics/ Drugs/IMFL amala ayokba/alemba lira anasatiba Police Station mesüra Narcotic Police Station mesüra 'Call Your Cop' mobile App mesüra Madeinagaland platform nung osang agütsütsü ayongzüker. Osang agütsürtem identity temai madoktsütsü, ta Nagaland Police ajangasa ashi.

NRC ajanga self-defense nung tetsür kaketshirtem tushi

Dimapur, Mongputeni/Oct. 20 (TYO): Nagaland Resources Center (NRC) ajanga Kohima District Administration aser District Hub for Empowerment of Women (DHEW) den lungjemer tetsür kaketshir nem self-defense tesayuba agütsüba tembangba sentong ka October 19, 2023 nü agia liasü.

"BetiBachaoBetiPadhao" mapatong kübok self-defense class agiba nung tajungtiba shilem agiba tetsür kaketshir nem tetushi agütsütsü nükjidong yur iba sentong ya ayongzüka liasü.

"BetiBachaoBetiPadhao" sentong ya Kohima District Administration ajanga Performing Art With Fitness (PAWF) aser DHEW den lungjemer tenzükba liasü.

Iba mapatong ya "Invest in Girl's Right: Our Leadership, Our Wellbeing" omen nung

ajemdaker ayongzüka liasü. Iba sentong ya Kohima nung aliba TM Government Higher Secondary School aser Dr. N Kire Hr. Secondary School nung agia liasü.

Tanur tetsürtem yaria iba ama sentong tajung ayongzüka asoshi Khriezotuoie Chase, Program Manager, Nagaland Resource Center (NRC) ajanga Kohima District Administration nem tenüngsang agüja liasü.

District Administration aser NRC lokteper mapa tajung inyakba atema pai pelaba lemsatper aser tarutsü anogotem nunga iba amala sentong maneni ayongzüksü nüngdak ta ashi.

Nagaland Resource Center (NRC) ya tetsür aser teburtem teinlonglong mapang terenlok aser shisaliok asoshi bendanga agütsür inyaker. Iba den külemi NRC ajanga mata-mabensar nem tashi-temeden agütsüba nung rangloker inyaker.



Telangana nung state assembly election agitsü mapang ana nung lia October 20, 2023 nü Congress lenir, Rahul Gandhi-i Jagtial district semdangba mapang pai party pusemertem dak teka ayiploksüba noksa nung angur.

Canada-i India nung aliba sensotem dang kümdangtsü metetdaksü

New Delhi, Mongputeni/ October 20 (Agencies): Canada-i India nung aliba par sensotem dang kanga kümdanga alitsü metetdaksüogo.

India aser Canada na tsüingda tesendaktep tamajungba küma Canada-i par ketdangser 41 India nungi aniteta anir aoba aser India nung aliba Canadian diplomatic missions teimbaka shibangba sülen parnoki India nung aliba sensotem dang kümdanga alitsü metetdaksür.

Canada nung Khalistani kiralongrar ka kasetba nung India-i shilem agia lir, ta Canada Ato kilonseri tai tongloksüba sülen nungi linük ana tsüingda tesendaktep raksa.

Canada-i India nung aliba par sensotem dang, India tesem mashie nung kiralongrartemi Canada nungertem amaktsüa akok, ta tekümdangtsü metetdaksü.

Osang kaketterem aser social

media nung Canada nunger anema jembiba kanga bulua akümba sülen longkak aittsüsa aliba mapang ka nung Canada-i par sensotem dang India nung kanga kümdanga alitsü metetdaksür.

Canada ketdangsertemisa, Canada anema longkak aittsüa akok, Canada nunger anema inyaktsüa akok aser amokmerentsüa akok, ta metetdaksü.

Delhi aser National Capital Region nung Canada nungertemi kanga kümdanga alitsüla aser memetetba nisungtem den pei nija osang melemsatepsüla, ta Canada-i metetdaksü.

Tawa Canada Ato kilonser, Justin Trudeau-i, Canada nung Khalistani lenir, Hardeep Singh Nijjar tepsetba nung India-i shilem agia lir, ta tai tongloksüba sülen nungi linük ana tsüingda tesendaktep kanga mejungi aküm.

Canada-i India nung aliba par ketdangsertemi lendong majurutsü atema ketdangsertem aniteta anir aoba ajanga Chandigarh, Mumbai aser Bengaluru nung Canadian consulates shibangadokogo; joko service ajakji New Delhi nung aliba Canadian High Commission nung ang angutsü.

Canada Foreign Affairs Minister, Melanie Joly-i, Canada-i international ozüing kübok alitsü aser India den ken o jembitsü melunga lir, ta metetdaksü.

Laisa, India nung diplomatic staff tem ajemtsü telemetba agiba ajanga service agütsüba nung kongshitsü, ajisüaka Canada-i maneni India nungi visa applications agizüksü, ta metetdaksü.

Canada Ato kilonser Trudeau-i iba mangatettep bentettsü atema India sorkar den ken o jembitsüji kanga tongtibang, ta shiogo.

CBI-i asüngdangbatem langzüksü ni melunga lir: MP Mahua Moitra

New Delhi, October 20 (Agencies): Hokolbarnü Trinamool Congress (TMC) MP, Mahua Moitra-i, Lok Sabha Ethics Committee-i 'Cash for Query' mangatettep bushisüngdangbaji pelaa agizüker aser CBI-i asüngdangba ajak langzüksü lai melunga lir, ta metetdaksü.

Hokolbarnü Mahua Moitra-i X ajanga, "Ni CBI aser Ethics Committee (BJP züngsem teimba aliba luden)-i asüngdangba langzüksü melunga

lir. Adani-i tuyuba osangbenertem mesüra BJP-i aitsübatem langzüksü atemabo ni mapang mali mesüra ni mejangrar. Ni Nadia nung Durga Puja jangratema amonger," ta metetdaksü.

Hokolbarnep Advocate Jai Anant Dehadrai-i X ajanga, pai Central Bureau of Investigation (CBI) nem ken o agüja aliba agiendaktsütsü atema kari meranger, ta metetdakja liasü.

"Yashi nikongdang kü dang ozü azü Henry melen CBI nem

agütsüba ken o aser Nishikant Dubey nem agütsüba shidi agienang ta ni ajungshia liasü. Ni memelung aser ni osang tejangja CBI nem agütsütsü. Osang belenerji tai mali saka nü dang la indang ajak ashir," ta metetdaksü.

'Cash for Query' nung TMC MP, Mahua Moitra-i shilem agia lir, ta tai tonglokja lir.

BJP MP Nishikant Dubey-i iba dak sendakba nung Moitra anema Parliament Ethics Committee nem ken o agüja lir.

Kobi melii India nunger itai atutsü: PM Modi

New Delhi, October 20 (Agencies): Hokolbarnü Ato kilonser Narendra Modi-i, India nunger space sector nung terenlok atema sorkari sentong asameyangogo, aser kobi melii linük nung yangluba spacecraft nung India nunger itai tua anenzüksü, ta metetdaksü.

New Delhi nung tang mezüing Namo Bharat train semzüksüba sentong nung jembidang Ato kilonseri, kobi melii India nunger Gaganyaan nung astronaut tem space-i atutsü aser linükisa space station ka amenoktsü sentong lir, ta ashi.

"Space sector atema onoki 2040 küm tashi asoshi asalentong yangluadokogo. Asenoki yangluba spacecraft nung India nunger ka itai tua anenzüksü anogoji menoa mali," ta pai ashi.

Modi-isa tawa India nunger Chandrayaan-3 ita nung anenzüka ita nung wako songa yutsüba bilemteta jemb.

Aso 21buba India-i terenlok tsütsü otsü tasen yangludar aser ita nung Chandrayaan anenzüksüba atema ajanga alimai kanga süngmang, ta pai ashi.

Taküm August 23 nikongdang 6:00 ako tera süir ISRO indang Chandrayaan-3 Lander Module (LM) ita nung takok ngua anenteta. Tang tashi

nung India densema linük pezüi dang iba alizüing tongteta lir aser ita south pole nung anenzüksüba satellite bo Chandrayaan ya mezüingbuba lir.

"Linük nung G20 Summit junga ayongzüka katetba ajanga tanübo India ya tangar puadaktsüba tiyongtsü ka kümogo aser alimai asenok den sendaktepsü atema maongka tasen bushir. Tanübo India-i Asian Games nunga medal 100 dak tema angur," ta pai ashi.

"Tanü India-i pei sasa 5G tenzüker aser ibaji linük tesem ajakleni bener aoer. Tanü India nung digital transactions ji alima nung teimtüba lir. Tanü semzüksüba Namo Bharat trains ya-a India nung yangluba lir," ta pai metetdaksü.

Tan ita tetenzüklen Ato kilonseri Indian Space Research Organisation (ISRO) atema alizüing kar yua engineer aser scientist tem dang 2035 küm tashi nungbo space nung India nunger temeja Space Station ka amenoktsü aser 2040 küm tashi nungbo India nunger astronaut ka ita yoktsü atema meranga inyaktsüla, ta ayongzüka liasü.

Modi-isa scientist tem dang Venus Orbiter ama interplanetary missions tenzüksü aser Mars nung anenzüksü atema merangtsü ayongzüka liasü.



October 20, 2023 nü Sahibabad nung Ato kilonser, Narendra Modi-i Delhi-Meerut RRTS Corridor semzüksüba sülen pai Regional Rapid train 'Namo Bharat' nung kaketshir kar den jembidang tangokba noksa nung angur. Iba train ya Sahibabad aser Duhai Depot station na tsüingda senzüksü.

Punjab Angh-i bill asem magizükba anema sorkari SC ajurutsü

New Delhi, October 20 (Agencies): Hokolbarnü Punjab Chief Minister, Bhagwant Mann-i, state assembly nung benoktsü aliba bill asem Angh-i agizüksü memelungba anema state sorkari Supreme Court nem temepishiba ken o agütsütsü, ta metetdaksü.

Chief Minister Mann-i Speaker, Kultar Singh Sandhwan dang, sorkari item bill ka danga assembly nung mebenoktsü, anungji senden thinenang, ta metetdakja liasü.

Mann-i Speaker dang, "Onoki Punjab nungertem dang iba senden amenba ya tim, ta mesayu tashi aser Angh-i bill asemprong agizüka sign masü tashi onoki senden nung bill ka danga mebenoktsü," ta metetdaksü.

Paisa, "Tarutsü nung onoki Supreme Court ajurutsü," ta metetdaksü.

Mann-i mepishiba nung ajemdaker senden thinentü atema bangzüng ka renem aser assembly nung bangzüngji agizüka senden thinen.

Punjab nung Angh aser AAP sorkar na tsüingda maneni tashi sayutepba mapang Brihostibarnü Punjab Angh, Banwarilal Purohit-i shidi ka ajanga chief minister dang pai Bill asemji magizüker, ta metetdakja liasü.

Purohit-i, sorkari ozüing alema assembly senden ayonger, anungji parnoki yamaisa inyakra pai tim teinyaktsü inyaktsü aser linük Tir nem iba osangji metetdaksütsü, ta ashi.

October 20-21 anogotem nung senden ayongzüka budget senden atsülangbaji ozüing alema lir aser iba senden nung lemetba ajakji ozüing alema asütsü, ta Angh-i metetdakja liasü.



New Delhi, October 20, 2023: Hokolbarnü New Delhi nung Environment Department-i ayongzükba 'Run Against Pollution' sentong nung lanurtemi shilem agiba noksa nung angur.



TIR YIMYIM YIMOBILEM (EDITORIAL)

DIMAPUR

KÜPTOKNÜ

MONGPUTENI 21, 2023

Tajungshirtem lima

Asenok lokti senden ajak nung taintemi jembiba ya angadagra mulung masü aser tajungshi o dang jembiba angashir, ajisüaka nübortem inyaksüba lenmangbo metuyuteter. Tanü asenok timtembaji yangji anendaka lir. Atangji, lokti nung tajungshir alibaji junger saka mapa küma inyaker mali ajak tajungshir dang süra ajibo majung. Aji oda, yimkong nübodoktsü ayongzüka yur ajak tajungshir dang asünungbo koda asütsü ? Ibaji mesüka tanü asen lima nung asen lima yanglushitsü tayongzüka agüja tajungshi o jembirtem dang ashi, mapa agi pei lima tajungba akümstsü atemabo shingaiya mesayuteti kümdagi. Iba jagi yimti yimdong temdanga yanglutsüba apu ka küm ter nunga jungjunga merenemeter, National Highways yanglu tenzükerbo joko silver jubilee amongtsü mapang atonger saka merenemer aser merenembaji dang masü, küm ka süli lenmang tilaba küma yangluli asüba angur. State stadium yanglu tenzüker asortem graduate süogo saka stadium-bo merenemer. Joko, Nagaland yimti yimdongtem taoka maktet aser teyanglushia meyanglutet janaona, lishi aser auyi agi sünga kümogo. Aji oda, Science college-bo lapok saka laboratory mepaloktsü, tesayurtembo meyok ta asüba agi Sao Chang College nung azüngertem akoksaba angur. Kasaji Dimapur nungbo kibo yanglu saka tesayurtembo meshim ta asüba agi kaketshirtem science zügnüseta mazünger. Ano, Nagaland tesem kar nungbo college-bo lapoktsü saka tazünger mali ta asüba tensa tia nung Nagaland odagi. Item ajakji asenok ajak teinyaker masü tajungshirtem dang asüba agi ataloker. Anosa, asenok rongnung mapabo mali ser tajungshi o dang jembiba mongra, tang center nungi yokba relief jang den chiyongtsü aon-a malitet akümstsü ana nung lir. Iba tensa tia ya meteta asenok rongnung tajungshi o jembiba anentsüla aser mapa inyaksüba. Asenok taintemi tajungshi o jembibaji angadagra, aikati pei dak mapet tajungshi o tebanga matsüshi jembir. Aji oda, nibo kecha meinyaker ser nung tangar dangbo mapa meranga inyaksü ajungshir, nibo Tsüngrem metsübur ser nung tangar dangbo Tsüngrem tsübuttsü ajungshir, nibo küsasa achiajem aser shi azü mazüokteteter ser nung tangar dangbo Laishiba nungi dena tapet lai o agiteta sayutsünger. Nisa ochimashiba, sen ter nunga ochimeshitetba taküm saka tangar dangbo ochishia alitsü ajungshir ta aueri mauyatsü ajungshir amai ka dang asenok lokti senden nung jembiba tajungshi o tem kümogo. Aji oda, asenok taintemi tajungshi o jembibaji ajungshir dang ashi, asenoki lanurtem dang pei taküm aser pei lima tajungba akümstsüba shisa lenmangbo mesayuteter. Ibaji lenmangbo mali ser junga oang ta shijen ashi amai lir. Joko, tanü putu yabo tajungshi o jembiba putu masü saka tajung akümstsü asoshi pei taküm mapa agi inyaka sayuba putu lir. Iba amaji, tanü putu yabo tajungshi o kisünger masü saka mapa inyaksü lenmang (idea) sayutepba putu lir. Aji oda, asen lima jungdaksüdi süra, asenok taintemi nübortem dang oang ta masü saka kü sülen ni inyakba amai inyaka arung ta ashitsüba putu lir. Kasaji yimten, lokti aser arogo nung lenirtemia, o agi dang masü, pei taküm mapa agi nübortem dang inyaka sayutsü mapang tongogo. Joko, tajungshi o bo ojang jembidi, kechiyong asenok onsara ajungshitepba yangi asenok ajak ya mapa inyaker masü saka tajungshirtem dang akümer. Aji oda, tajungshi o jembiba -jembiba asenoka talidak makatsüsa jembitetertemji asenok lir. Itemji kong agitsü ? Tajungshi o jembitsüba yabo mapa tasak asütsüla, kechiyong pei taküm agi athishia jembitsübaji tajungshi o lir. Ajisüaka, tangar dangbo ochishia alitsü ajungshili asenbo taliang ochimashiba kümli ta süra asen tajungshi o ji kechisütsü ? Joko, lanurtem danga mapa inyakang ta majungshili saka ya inyakang ta shidi. Iba jagi dang lanurtem shisa tenük lapoktsü aser parnok nung maangka aser khurer metettsü. Tajungshir limaji junger saka tajungshir lima dang nungibo teinyaker limasa tajungba asütsü.

OLEMSABANG

ABAM 1986 lemtet

Molungkimong arogo otsü nung koba mangatetep talangka kaa aru, ibaji tembanga repringshitsü iba Special Committee nung nisung 17 shimteta Mungdang tenünger nung Mungdang mendenbubai shimteta tashi ajak agütsür. Iba Committee yangi tamalen inyaka aliba maparen ajunga shisadanger kechi telemtetba arudir aji tatembang asütsü Mungdangi parnok nem tashi ajak agütsür ta 1980 ABAM Central Council nung lemtet.

Anungji iba Committee November 7, 1980 Impur nung meeting amenba mapang Molungkimong arogoi onok tamanger karbo yimsen akümi mai ta nisung tenünger dena kuli agütsüba yong par arogoji khena medangdangi aru ta onoki lemtet. Saka iba telemtetba nungji Molungyimsen putui par yimküm otsü nung kongshi ta shia obendanger dangi iba ken o abentsü (asür) Tajenyuba Ao (advocate) dang asünger. Tajenyubai Molungyimsen nung terbilemba aser parnok noktadk kuliji repringer, iba keno alima bangdak (court) dangi aben nungbo ABAM atema timtem asütsü ta angateta ABAM Executive Secretary (asür) Rev. K. Lanumeren dang Special Committee ka shima ibai bushitsünger dangshi. Tajenyuba-isa Molungyimsen putu yimsüsür dang iba keno court nung masü, saka arogo ajanga ABAM dangi o abentsü indang ashi. Molungyimsen putu yimsüsürtemi lenir Tajenyuba-i ashiba kenoji agizüka court nung agütsütsü alibaji songtema ayu.

Anungji 1981 ABAM Central Council mapang nung iba keno Molungyimsen Baptist Arogo-i ABAM dangi aben, aser lokti nung jembiteper 1980 ABAM Special Committee lemtet nungji aibelen kar repringtet nung ibaji bushitsünger atema Special Committee nisung 15 shim. Iba Committee ajanga 1981-1986 parnok mensem aiben mena Impur nung aliba züluyuyim (documents) aser ano oagi American Baptist Convention Mendenti nungi Ao Naga tenem nung Khristar arogo tenzüka otsü züluyuyim den medemdanga bushiteper 1986 ABAM Central Council nung parnok ngutetba osang agütsüba teloki agizüka ayu.

Molungyimsen yim akümdaki moi Molungkimong nung tamanger par 4 liasü ta ashibaji, 1. Supongmeren, 2. Imnameri, 3. Imlichuba aser 4. Imnapokyim. Parnok rongnung Supongmeren baptiba record mangur, Imnameri 1879 19th November Molungyimsen nung atsünger aser Molungkimong-i meyipa tugu, Imlichuba 1892 küm Molungkimong nung arogo tenzükdang transfer asü, Imnapokyim par semchisemnurtem Molungyimsen nung tanü tashi lir. Anungji pa Molungyimsen yim akümi aoba jangjar ta 1986 Special Committee-i shia angur. Item kulitem ajanga onok 1980 Special Committee-i lemtetbaji kuli makai kümdaktsü.

1981-1986 ABAM Special Committee-i shisa kaa rajema lemtettsübayong 1997 küm Molung yim ana 125 jubilee sentongtem nung ABAM Executive Secretary Rev. L. Kari Longchar-i shilem agia liasü. Iba den 125 ABAM Jubilee Impur nung amongdang Ao arogo ajak kecha tashishi makai mongogo.

Tatem nung tanü lanu putu dang onoki ya ashir, Ao Naga tenem nung Khrista arogo tenzüka otsü nung mangatetep aruba ajak tiptema tembangtsüsa Tajenyuba Ao shibai ABAM yariogo, asen lenir Rev. K. Lanumeren aser Rev. Riküm shirnok mapang item ken o ajak tembangtsüogo parnok dang peladi. Tanabuba nung tang ABAM-i Settlement Committee ka shimteta aliba telok yangi teti asoshi iba keno tembanga inyakkadjang ta sarasasadem nung yaridi arung ta ayongzüker.

Rev. P. Longri

Rev. Tongpanglepden

Rev. S. Apong

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

America nunger aser Khristan ajaki Israel pusemstsüla: Peter Demos



Peter Demos

October 20, 2023: Tang Israel aser Gaza na tsüingda raraba mapang nung Khristantemi iba tensa ya junga mita alitsüla, kechiyong Tsüingremi asenok dang shirnok pusemstsüar tetuyuba agüja lir, ta Demos' Brands Tir aser CEO, Peter Demos-i ashi.

'On the Duty of Christian Civil Disobedience' kaket zülusang, Demos-i, "Taoba hopta kiralongrartemi amakdang nisung jenti asüba taoksatsü osang asenoki nguogo. Tetsürtem tashiyim amshia raksatsü aser tanurtem lung agi onsetsa südaktsü. Tai maket nisungtem anema inyakba tatalokba aika video

tangoka liasü aser tamakertemi benjungtepba ajanga parnok dak meimchir shisatsü maliba sayuogo. Music festival ka nung Israel nunger lanurtem tepsetba noksa tu shingaia kanga kerabo mamadoktetsü," ta ashi.

"Iba ama kiralongra ya aitsütsü tetemsü aser America nunger ajak den alima nung Khristan ajaki aitsütsüla. Iba ama linük tilaka dang süaka tashitait linük ya Tsüingremi shimtetba nüburtem lir aser Tsüingremi asenok dang item nüburtem meimstsüla, ta ashir. Meimchir ka ama aser Tsüingrem sülen anidakertem ama asenoki iba rara aitsütsüla

aser iba rara ajanga kongshiba tai maket nisungtem atema sarasademstsüla," ta pai ashi.

"Middle East nung Khristantemi sadoksadoka pei yimsü amangetba tesem kar dang lir, aser item rongnung Israel densema lir. Iba tesem ya Khristan yimsü tenzükba tesem lir; Laishiba nung aliba puti otsü indang tongtibang tesem aika lir," ta pai ashi.

"Lipok tapu 12 nung Tsüingremi Abraham dang Pai sayuba lima kati aotsü tuyur. Tsüingremi Pa (Abraham) nungi kin tuluka kümdaktsütsü nangzük. Iba kinji Yihuda kin Israel aküm, aser Abraham dak nungi jazüka Yisu Khrista aru. Tsüingremisa, 'Ni na moatsürtem moatsütsü aser na atakatemertem atakatemtsü' ta ashi (Lipok 12:3)," ta paisa metetdaktsü.

"Kibubai iba ya Abraham aser pa dak nungi jakzükbatem indang jembiba lir, aser tanü iba ya atangji ataloker," ta pai ashi.

"Linük ka ama aser Khristantem ama asenok teinyaktsü mezüingbubaji, Tsüingremi shimtetba kin (Israel) pusemstsüla aser Pa tekümsükba atema sarasademstsüla. Tang Israel-i asenoki pusemba nüngdaker. Israel kümsüksang memejanger mesüra amoi maoer (T Ken 121:4). America den tembar aser Tsüingremi shimtetba nübur- Israel den nokdakang," ta paisa ayongzük.

Khristan film 'Ordinary Angels' sangküm February ita nung sayatsü

October 20, 2023: Khristan film 'Ordinary Angels' October 2023 nung sayatsü sentong liasü saka atsülangogo; iba film ya sangküm February 23 nü ang sayatsü.

Iba film ya taküm October 13 nü sayatsü sentong liasü saka concert film 'Taylor Swift: The Eras Tour' sayatsü aliba aser 2023 SAG-AFTRA strike aliba ajanga thinen.

'Jesus Revolution' film yanglurtemi Khristan film tasen, 'Ordinary Angels' ya sangküm ang sayatsü

telemtetba agi.

Lionsgate indang Ordinary Angels film nung tongti shilem agir anaji Alan Ritchson (Reacher, The Hunger Games: Catching Fire) aser anaben tashi Oscar award angur, Hilary Swank (Million Dollar Baby, Logan Lucky) na lir.

Film tasenba ya Jon Gunn-i direct asü aser Produce asürtem rongnung Kevin Downes, Jon Erwin aser Andrew Erwin nunger densema lir.

Jon Gunn-i, "Sharon Stevens

aser Schmitt'er kibong otsü ajanga, asenoki tangar yariba ajanga asenok sasa asen taneptsü anguba asenok nem nenshia metetdaktsür. Tang alima den lemsateptsü osang tajungtibaji ibaji lir," ta ashi.

Swank-i, "Iba film ajanga asenok dang, kodak tenyartemji tesem ajaklen asenok rongnung densema lir, ta asenok nem nenshia metetdaktsür. Iba denji külemi tamang, teimla, tasü-aitba aser tajung bilembaji sayatenya atema totzü lir," ta ashi.

Gaza Strip nung Khristan 16 pokset

October 20, 2023: Israel-i anünglen nungi Gaza Strip amakdang Arogo kiojen ka chirepogo, aser iba lendong nungji Arogo building nungji jenoka alir Khristan 16 poksetogo, ta osang ka ajanga metetdaktsü.

Brihostibar nikongdang Greek Orthodox Arogo Tenla ki compound nung Arogo indang building ka chirepba lendong nungji kibong ka nungi züingsem ter densema Khristan 16 süogo.

Aid to the Church in Need (ACN) indang project partners-i ashiba agi, ki chirepba jana agi ano Khristan 15 shi nembanga lir.

Church of Saint Porphyrios indang Tenla kijibo bomb agi mekongshi. Israel aser Gaza na tsüingda rara tenzükba sülen iba Arogo compound nungji Khristantem teimba ser nisung 400 shi jenoka lir.

Asürtemji teimbaka Latin Patriarchate of Jerusalem

kübok Khristan lanurtem indang "Employment Generation Project" nung shilem agirtem liasü.

Orthodox Arogo indang compound ji Holy Family Catholic Arogo nungi metre noklang ishika dang pilar lir. Catholic Arogo Tenla kidangjia Khristan 500 shi jenoka lir.

Khristan aikati Greek Orthodox compound ji toktsür Holy Family Arogo Tenla kidangi oa yangji jenoka lir.

ANOGO ABEN TSÜNGREM DEN

Talang nung anguba

T. Ken 73:18-28

"Nai ne shisatsü agi ni anitsü, aser tesülen sentsüwangshidaki agizüktsü" (t.24). Asaphi tarendak mapang ka ajanger külen iba tekong ya zülu, aser ibai pa temulung makai aruba tesüingmangtsü ka tembanga zülu. Pai tejangja temetetba kar angu.

Mezüingbuba, Tsüingremi asenok sotter. "Aji saka maneni ni ne den lir: Nai kü tajichi teka nung sot" (t.23). Tamajungeri azü tokshiba inyaktsü akok, peria akatsü akok, azükaru aser temoatsü akatsü akok. Saka asenok Tsüingrem aka aser pai asenok sotter.

Tanabuba, Tsüingremi anir. "Nai ne shisatsü agi ni anitsü, aser tesülen ne sentsüwangshidaki agizüktsü" (t.24). Tesülenbaji tongtipangba mapa lir. Tesülen kechi ataloktsü? Asenok Pa den teti alitsü ta asenoki jangjatsü akok. Iba temang nung tang takar süa aliba aser tarutsü taküm nung takar süa alibaji tera balala lir. Iba lima nung takar kar tarutsü aliba lima nung sensaker asütsü akok. Saka iba lima nung sensaker aika taruba lima nung takar alitsü.

Tasembuba, Tsüingremi asenok tashi itdaktsür. "Kü shi aser kü mulungjangi tamakok angur: saka teti Tsüingrem kü mulungjang tashi aser kü shilem lir" (t.26). Pezü, Tsüingremi asenok taküm jenjang ajak nung yarir. "Saka na anasa arutsü ni asoshi junger" (t.28). Asenok kong lidir liang, kechi ajanga odir oang, asenoki Tsüingrem anasai aotsüla. "Pa mapa ajak ashitsüsa ni Kibuba kü jenokdak kümdaktsüogo" (t.28).

Kotak nung Kibuba den ki ka akatsü tenangzükba agi asenok tasü itdaktsür. Tsüingremi na jenjang tulu agi alizük, aser Pai na kechisarena ajanga kümszüker. Kechi tejangja tenangzükbatem asenok aka!

Myanmar nung aliba IDP camp ka nung Khristan 29 pokset

October 20, 2023: Myanmar linük nung sepaitemi item nung sepaitem aser lisopur tesem jagi aotsü memelar. Taküm küm tomolen nisung meyrjang aikati pei ki Myanmar nung Mocha yipru toktsür IDP camps nung lendong atalokba sülen United jenoka lir.

Taoba hopta Kachin State nung sepaitemi anünglen nungi tashidak balala poktetsü, ta internally displaced people tekümdangtsü metetdaktsüba (IDPs) camp ka amakba sülen telok balalai teyari mapang nung tanurtem agütsüba maparen inyaknüa densema Khristan 29 pokset aser 56 yiruogo. Iba tatalokba nisung sorkari international sülen IDP camp toktsür melungtet teloktemi amshiba ajenertemji tang arem nung transportation services ajak jenoka lir, ta Khristan melungtet nokdangogo.

Open Doors local United Nations-i Myanmar partners-i metetdaktsü. kübok Rakhine, Chin, Magwe,

Myanmar nung Sagaing aser Kachin regions International aid, local charities nung yipru lendong agi kongshir aser Khristan melungtet telok nisung million 1.6 yaritsü atema dollar sen million 333 agüjang maparen inyakner, ajisüaka ta mepishia lir.

**AO OSHI ANGAZÜKDAK:
TANÜ ANGAZÜKTSÜBA OJANG**



Sarasarar

(adj) tetsüngtep masü paraparar (loosely knitted)
* Kidang jara sarasarar enokba agi mopong atur.

Sarem

(v) temulung nung rema ayuba shisatsü (covert)
* Sarem shisatsü alir den medemtsü tasak.

OLONG PAITEP # 6672

1		2		3		4		5
						6		
7			8				9	
					10			
			11					
	12							13
14						15		16
				17				
18								
						19		

TIPIEN

- 1. Anguba shilem - (5)
- 6. Tsüngsangba korang - (5)
- 7. Temadok - (5)
- 9. Taso - (4)
- 11. Kibong akümba - (5)
- 14. Teka agi tashi-i amet - (4)
- 15. Tzü shiruru ka - (5)
- 18. Talang nung masü - (5)
- 19. Shisadanga reprang - (5)

LANGTSÜNGLEN

- 1. Tenarong majung - (5)
- 2. Ninang tulu ka - (4)
- 3. Kilong masü - (4)
- 4. Lemzük - (3)
- 5. O tetenzük - (5)
- 8. Mesaklok - (5)
- 9. Komo tamaisü - (5)
- 10. Ne den tantsü - (3)
- 12. Zülüjang - (5)
- 13. Nükshi - (5)
- 15. Mi jangruba anen - (4)
- 16. Nükjidong - (4)
- 17. A _ _ _ a - (3)

OLONG PAITEP # 6671 TELANGZÜBA


TIPIEN :

- 1. Aben, 4. Artsü, 7. Lisem,
- 8. Liwa, 9. Sarasadem,
- 12. Aket, 14. Mangu, 15. Anünü,
- 16. Ango.

LANGTSÜNGLEN :


- 1. Aruli, 3. Balala, 5. Suwar,
- 6. Belem, 9. Sүjak, 10. Aonung,
- 11. Dokan, 13. Tinu.

NAI-A YA METETTER MA



Meimchirtem rongnungi mezüngbuba ita lima nung metsümeshisangji (urinate) America nung scientist Buzz Aldrin liasü. Ita lima nung tetsüng ajemokli mapang tatsüka tsüngda nungsa pai natzü natok. Ano ita lima nung mezüng tetsüng ajemoker tem rongnung Neil Armstrong sülenbo pa tanabubaji liasü.

Noksa nung meputepi aliba 5 bushiang



Assam sorkari NLFB züngsem shia nem Rs 2 lakhs agütsü

Guwahati, October 20, 2023

(Agencies): Bodoland Territorial Region (BTR) nung yimjung aser terenlok bener aruba atema Assam Chief Minister Himanta Biswa Sarma-i tenüngsang agütsüogo.

Paisa nübertemi Prime Minister Narendra Modi indang asalentongtem nung temulung alemba atema pelaba metetdaksü.

Hokolbarnü National Liberation Front of Bodoland (NLFB) nung taoba züngsem 181 shia nem Rs 2 lakhs teyari agütsü.

NLFB-i July 2021 nung temai adoka liasü aser tanü CM Sarma-i taoba mapang

telungpur alirtem dang temai adokba atema pelaba metetdaksü.

"State sorkari nenok asoshi rehabilitation support aser mapa inyaksü maongka balala agütsüba den skill development programs nungi tajangzük agütsü ayongzük" ta Sarma-isa ashi.

BTR tanishir Pramod Boro-ia Financial Grant Distribution Ceremony nung shilem agi. Iba sentong ya Madhabdeb International Auditorium, Guwahati nung ayongzük agi.

"Prime Minister Narendra Modi aser Union Home Minister Amit Shah lenisüba kübok BTR nung putu tasen ka

tenzüko aser küm aika ozüng alema inyaksangshia aruba anenogo" ta Pramod Boro-i ashi.

CM Sarma-i lenisüba kübok Assam sorkari taoba mapang NLFB züngsem shia nem Rs. 2 lakhs agütsüogo aser iba ajanga BTR nung tensa tajungba akümtsü ta paisa ashi.

Financial Grant Distribution Ceremony nung MLA Lawrence Isary, EM Ranjit Basumatary, Assam Police DGP G.P. Singh, Secretary, Home & Political Dept (IAS), Biswajit Pegu, ADGP, SB & STF Hiren Chandra Nath, Dr. Ravi Kota, IAS aser ano tanga ketdangsiir aika aden.

Mizoram election atema BJP-i star campaigners shim

Aizawl, October 20, 2023

(Agencies): Mizoram nung November 7 nü election agütsü aliba atema Bharatiya Janata Party (BJP)-i mapa tenzüko.

Hokolbarnü BJP-i Mizoram elections atema campaigners 40 tenüng metetdaksüogo aser iba nung Prime Minister Narendra Modi dena lir.

BJP-i campaigners list sayaba ajanga parnoki Mizoram assembly elections atema süoki ia bilemba sayur.

Tanü sayaba tenüngtem rongnung Prime Minsiter Narendra Modi-i anir lenirtem lir. Tangar ajak dak alia BJP national president JP Nadda, Raksha Mantri Rajnath Singh, Union Home Minister Amit

Shah, Union Shipping Minister Sarbananda Sonowal, Union Minister Smriti Irani, Assam Chief Minister Himanta Biswa Sarma, Union Minister Kiren Rijiju, Tripura Chief Minister Manik Saha, Nagaland Deputy CM Y Patton aser Nagaland BJP president nung tenüng-a iba list nung dena lir.

Mizoram assembly elections atema BJP campaigners:

- 1. Narendra Modi, 2. Jagat Prakash Nadda, 3. Rajnath Singh, 4. Amit Shah, 5. Nitin Gadkari, 6. Sarbananda Sonowal, 7. Arjun Munda, 8. Smriti Zubin Irani, 9. Himanta Biswa Sarma, 10. Dr. Manik Saha, 11. Nityanand Rai, 12.

- Nisith Pramanik, 13. Kiren Rijiju, 14. Pratima Bhoumik, 15. Rajeev Chandrasekhar, 16. John Barla, 17. Yanthungo Patton, 18. Sambit Patra, 19. Rituraj Sinha, 20. Anil K. Antony, 21. Mmhonlumo Kikon, 22. Dr. Numal Momi, 23. Temjen Imna Along, 24. Phangnon Konyak, 25. Santana Chakma, 26. Vanlalhmua, 27. Delson Notlia, 28. Dr. BD Chakma, 29. Vanupa Zathang, 30. T. Zakunga, 31. Malsawmtluanga, 32. Suni Lalthangmawii, 33. Lalrinliana Sailo, 34. Dr. K. Beichhua, 35. Pramod Reang, 36. Sambu Lal Chakma, 37. M. Laikaw, 38. Sandeep Agarwal, 39. Bruto Meska, 40. Lalrinkima.

Bishnupur bomb lendong atema NIA-i nisung tanabuba apu

Imphal, October 20, 2023

(Agencies): June 21 nü Manipur kübok Bishnupur district nung bomb ka apokba dak sendakba nung National Investigation Agency (NIA)-i nisung tanabuba puogo.

NIA-i Manipur Police den yaritepa Mohammad Islauddin Khan apu.

Phougakchou Ikhai Awang Leikai aser Kwakta tsüngda aliba apu nung Scorpio gari ka nung IED enoker pokdaksüba mapa nung Islauddin-i shilem agiba NIA-i bushitet.

Islauddin apuba sülen pa Imphal nung okadaki anir ao aser idangji pa NIA ket nung anogo tenet ayutsü temelaba

agütsü. Iba ya masü dang NIA-i Assam Police den külemi Assam kübok Silchar nung Mohammad Noor Hussain puogo.

Iba bomb lendong nung nisung asem yiru aser apu den anameta aliba kiojentem raksa.

MZP-i Congress candidate Meriam Hrangchal magizüker

Aizawl, October 20, 2023

(Agencies): Congress-i non-Mizo nung ka den kibong akümba Mizo tsür ka parnok candidate asütsü shimba anema Mizo Zirlai Pawl (MZP)-i Hokolbarnü lungkak aitba sentong ka agiogo.

Yaküm December ita MZP-i political party tem dang tangar den kibong akümba Mizo tsürtem meshimtsü temepishiba ka agüja liasü.

MZP-isa taküm August ita iba kasa onük nenshia liasü aser ibala candidate ka state assembly hall nung amentsüba magizüker aser laji state nung alirtem tenüng nung masü ta metetdaksü.

State Law and Judicial department ajanga adokba Mizo Customary Law nung tapak 3:74 nung Mizo nung masür ka den kibong akümba Mizo tsür kati la kinungbo

indang sobaliba, inyaksangshi aser maitsü bentshitsu ta lateta lir, ta MZP-i ashi.

"Congress-i non-Mizo nung ka den kibong akümba tetsür ka candidate asütsü shimba aitsür. Parnok kinungtsü ajanga non-tribal kati legislative assembly amentsüba onoki magizüker. Onoki iba atema lungkak aitba sentong tuluba agütsü" ta MZP president H. Lalthianghlina-ia ashi.

MZP-i tuyuba anema Congress-i Lunglei South constituency nungi Meriam L. Hrangchal shimogo.

Lai Gurkha nung Dipen Zoliana den kibong aküm aser la kinungboi Khristan yimsü agizükogo aser Mizo maitsü benshir.

"Congress party-i Hrangchal kinungbo agizükogo. Pa ya Mizoram nung 'Mizo'

nung ka ama alir kechiyong parnok kibongi Mizo maitsü aser Khristan yimsü benshir" ta Congress senior vice president Lal Thanzara-ia ashi.

Election Commission-i la indang tenüng magizük tashi Congress party-i la memelentsü aser lai Lunglei South nungi tokteptsü ta Thanzara-isa ashi.

MZP-i mepishiba angaa BJP-i Brihostibarnü Tuivawl constituency nung parnok candidate melenogo.

BJP-i tamasabo non-Mizo nung den kibong akümer Judy Zohmingliani candidate asütsü shima liasü saka la melenogo.

November 7 state assembly election atema Mizo National Front (MNF), Zoram People's Movement (ZPM) aser Congress teloktemi tetsür anana shimteta lir aser külen BJP-i tetsür 3 shima lir.

**Nagaland Institute of Medical Science and Research
Kohima: Nagaland**

ADVERTISEMENT

No. NIMSR-6/1/Faculty /2023(Vol-1)

Dated Kohima October 2023

Applications are invited for eligible candidates to be filled up for NIMSR, Kohima.

PROFESSOR -09
ASSOCIATE PROFESSOR -18
ASST. PROFESSOR -06
SR. RESIDENT/ TUTOR -12

The details of the Qualification, Experience, Pay Scale, Application Form etc. may be obtained from the website <https://nimsr.nagaland.gov.in>

Sd/-
Director cum Dean
NIMSR,
Kohima: Nagaland

**GOVERNMENT OF NAGALAND
OFFICE OF THE DIRECTOR GENERAL HOME GUARD, CIVIL DEFENCE
& STATE DISASTER RESPONSE FORCE
NAGALAND: KOHIMA**

PUBLIC NOTICE

NO.HG-TRG-PSA/2023: This is for the information of all concerned that vide Government of Nagaland, Home Department (political Branch) Notification vide No.CON-1/G/26/10 dated Kohima 20th January 2020, the Govt. of Nagaland has designated the **Central Training Institute, Home Guards', Civil Defence & State Disaster Response Force, Toluvi, Dimapur**, Nagaland as the training center to provide training to the private Security personnel under the Private Security Agency Regulation Act 2005 (PSARA).

Therefore, all the private security agencies under Nagaland are hereby informed to submit the list of the new recruits to the undermentioned address on or before 30th November 2023 to undergo the said training at the Central Training institute, Home Guards', Civil Defence & State Disaster Response Force, Toluvi, Dimapur.

Address : To,

**THE DIRECTOR GENERAL
HOME GUARD, CIVIL DEFENCE
& STATE DISASTER RESPONSE FORCE
New Capital Complex,
NAGALAND: KOHIMA**

Sd/- (PRO) HQrs,
Kohima



**OFFICE OF THE
CHANGTONGYA STUDENTS' UNION**

P.O. Changtongya - 798613, Dist. Mokokchung, Nagaland

Regd. No.908

"To Achieve Destination"

TENÜNGSANG AGÜTSÜR



Dr. Jongpongrenla Jamir



Dr. Temjennaro Jamir

Changtongya Kaketshir Telungjem ajanga,

1. Rev. Dr. Rongsenmeren Jamir aser Wt. Tiasangla na jala Dr. Jongpongrenla Jamir-i Nagaland University nungi Livestock Production of Management Department nung Doctor of Philosophy (Ph.D) ngutetba asoshi tenüngsang agütsür. (Topic of Thesis - Influences of accommodation on the performance of ungraded Pigs)
2. Wb. Takoyanger Jamir aser Wt. Temsujungla na jala Dr. Temjennaro Jamir-i Nagaland University nungi Doctor of Philosophy (Ph.D) in Mathematics ngutetba asoshi tenüngsang agütsür. Tsüngremi nena taküm aser wadang ajak nung maneni moajangma. Kaketshir wadang nung.

Sd/-
Sp. Longjakrep Jamir
Tir, CKT

Sd/-
Sp. Tiarenba Jamir
Tongti Tezüür, CKT

JEMTIMENBA MOLLIER FOUNDATION (JMF)

**Tetsü Oshi Nung Alakteta Takok
Angurtem Tushiba Sentong**

Anogo : Mongputeni 24, 2023

Mapang : 10 Ako nungi

Tesentepdak: Ao Senden Conference Hall.

Sentong Meraketsür :

Wt. Sentinenla, District Education Officer, Mkg.

1. Sentongnir : **Wb. Tiatemsü Mollier, JMF**
2. Sarasademsü : **Rev. Sentimeren**
Asso Pastor, MTBA
3. Tarur Pela Agizükba : **Dr. Tali Imsong,**
JMF Mendenbuba
4. Temeja ken ka : Christian Residential Hr. Sec.
School, Mkg
5. JMF. Senpet Agütsüba Ratet : **Wb. I. Temjen Tzüür,**
JMF, Tezüür
6. Sentong Meraketsür 0 :
7. Senpet Agütsüba Mapang : a) Class 10 & 12
Sentong Meraketsür
b) Arangtet Tatidang:
Tir, Ao Senden
8. Tatem Sarasadem : **Wt. Narola Lemtur,**
Asso. Pastor Women, Mkg Compd.

Temetetsü:

1. Iba senpet agütsüba sentong nung 2020 küm nungi 2023 tashi Class 10 & 12 tatidang nung Ao Subject aser Ao Riju-i (ASLB ta aliba) achaayanga agiba Arangtet Tatidang nung marks teimtiba angur nem tetushi senpet agütsütsü.
2. Sentong nung adentsü asoshi senpet agizüker den tsürabur arua adentsü jaoker. Koda masüba kar ajanga senpet agizüker marutettsüsa kümra la/pa melen shibai agizüksü nisung tenüng tejangja jelia onok nem osang agütsütsü mepishir.
3. Iba sentong nung Ao Senden, Watsü Mungdang, Ao Kaketshir Mungdang aser Ao Riju nungi nübu pungungu arua adentsü pelashishia jaoker.
4. 2020 küm nungi 2023 tashi nung koba school nungisa class 10 aser 12 tatidang nung Ao subject nung teimtiba takok ngur lir item school-tem nungi tesayur ka den kaketshir pungungu arua adentsü pelashishia jaoker.
5. Mokokchung District kübok aliba High School, Higher Secondary School aser College-tem nungi Ao tesayurtem ajak iba sentong nung arua adentsü pelashishia jaoker.
6. Iba sentong nung adentsüpur ajak asen sobaliba sobutsü kabosa sobur arungma.
7. Nüngdakba purtemi agüja aliba M/Number nung tongtepratepdaksünür: 8787630243 & 7085914530.

Lost and found

Mokokchung town police point anasa MTBA ground floor nung aliba NSTCB ATM Booth nungi SBI indang ATM card ka shia arua Tir Yimiyim office Mokokchung nung tokja lir. Kiburi kuli tejangja den office mapang arua agizüksü metetdaksür.

Tir menden nungi atsüngdoker alisang Bazoum ajentsü merang: Niger mitkar

Niamey, Mongputeni/Oct. 20 (Agencies): Taoba tir Mohamed Bazoum jena aotsü merangba sentong lazüka iba tasa ya raksatsü ta Niger nung mitkar sorkari ashi.

Taoba tir ya aonung par kinunger, sorochioker aser security den külemi jena aotsü merang, ta mitkar odongtar kati ashi.

Parnok ya helicopters nung jena aotsü merang saka iba tasa raksatsü, ta pai ashi.

July ita tatemlen Bazoum ya pa indang presidential guard temi atsüngdokba sülen kidang pua yua lir.

Niger ya Sahel ta ajaba African region nung shilem ka lir, koba Atlantic Ocean nungi Sahara Desert south tsütsü Red Sea tashi lir. Iba tesem nungya jihadists aser mitkar temi yimsü asüba agi sünga lir.

Bazoum nunger ya Brehostiparnem 3:00 ako meta jena aotsü merang, ta mitkar odongtar Amadou Abdramane-i state television nung ashi.

"Atsüngtoker aliba Tir Mohamed Bazoum aser par

kinunger, sorochioker ana aser security ana pa pua aliba tesem nung jena aotsü merang," ta pai ashi.

Jena aotsü merangba nung tamakok ajuru aser 'main actors' aser teyariteper kar apu, ta pai ashi.

Iba sentong nungya Bazoum ya linük yimtiba Niamey tezülen tesem ka nung atsüksü liasü ta Abdramane-i ashi.

Iba sülen parnok ya "foreign power" indang helicopters nung Nigeria tsütsü aotsü sentong liasü.

Taoba tir aser tanünga telok ya pua ali asü maliar mejangja. Bushisingdang ka tenzüko.

Niger mitkar temi democratic yimya nung shima aliba tir ya tashiyim amshia July 26 nü atsüngdoka liasü.

Kasaji par kidanger Burkina Faso aser Mali nunga mitkar temi sorkar atsüngdoka lir. Iba region nungya Islamist telungpur aser Russia indang mercenary group Wagner tashi ulushia akumer.

Mali nung jihadists den raratsü amenoka aliba France

sepaitem dang Niger mitkar lenirtemi linük yutsür ainshitsü totuyuba agütsüogo. Niger nungi convoy mezüngbuba ya anogo toku jajar Brehostibarnü kidanger Chad linük tongogo, ta France mitkari ashir.

Bazoum yagi tir menden nungi alutsü memolunger.

Pa tepuokdak liaka The Washington Post nung article ka zülutet aser yangji pa ya 'hostage' ka lir aser tashiyim amshia sorkar atsüngdokba ajanga asen linük, asen region aser alima ajunga nung timtem tulu alitsü ta shia liasü.

Bazoum atsüngdokli US Tir Joe Biden-i pa tekeraba nung shioksü aser Niger nung kanga saka aazükba democracy wazüka ayutsü ayongzüka liasü.

Iba sülen West African linük temi kumtetba ECOWAS ajanga mitkar lenirtem dang yimten tashi meyipa agütsütsü anogo süzkütsüba süyidaksü.

Parnoki mitkar tashi amshitsü ta amokmerenba ama meinuak aser tir chioksü akhangba mitkar lenirtemi senzüka yutsür.

Yemen nungi khaloktsüba missiles tem US warship-i khazüka yok

Washington, Mongputeni/Oct. 20 (Agencies): Iran den sendaktepa aliba Houthi movement-i Yemen nungi missiles aser drones yokba US Navy warship ajanga khazüka yok, ta US ketdangsür temi ashir.

Pentagon odongtar kati ashiba agi, missiles tem ya Israel nung aliba targets tsütsü khaloktsü.

Brehostibarnü guided-missile destroyer USS Carney ya northern Red Sea nung liasü.

Pentagon-i ashiba agi, tawa Iraq aser Syria nung aliba US

sepaitem dak ishíben maka liasü.

Israel-i maneni Gaza nung Hamas targets amakdang Iran-i bhukumba telok inyakyim asoshi Washington saksalema lir.

Pentagon indang Brigadier General Patrick Ryder-i ashiba agi, Yemen nungi land attack cruise missiles asem aser drones khar yokba khazüka yok.

Iba tatalokba nung nisung yiruba osangbo mali aser warship dak tenük yokba masü amai ajitetter, ta US ketdangsür kati ashi.

"Item missiles aser drones

ya kechi nung khaloktsüar mejangja saka item ya Yemen nungi yok aser Red Sea ajanga north leni oa liasü, temetetba Israel nung targets tsütsü yokba alitsü," ta pai osangbener dang ashi.

Inyakyim indang osang tang tashi asadanger aser tanen makai amaker alitsü akok, ta Brig Ryder-i ashi.

Iraq nung US aser danga international forces aliba tesemtem nung drones aser rockets khaloktsü, ta Pentagon-i ashi. Missile kati sepai kar yiru.

(Maneni tapak 8 nung...)

United Cup nung Djokovic-i shilem agitsü, Nadal masayatetsü

Sydney, Mongputeni/Oct. 20 (Agencies): World No. 1 nung alisang Novak Djokovic-i 2024 season tenzuka Australia nung United Cup temeyoktep team nung asayatsü saka yirur alisang Rafael Nadal yabo Hokulbarnü sangdongba Spain team nung mali.

Sydney aser Perth nung December 29, 2023 nungi January 7, 2024 tashi asayatsü aliba asayamung nung Djokovic-i Serbia anir asayatsü.

2023 nung Nadal ya Spain team nung liasü saka pa taküm Grand Slam asayamung tenzükdang teperem yirua liasü. Iba sülen pa tennis asayamung kata nunga shilem magiteter aser June ita surgery agia liasü.

Nadal ya Australian Open nung shilem agitsü sentong liasü, ta Tennis Australia chief Craig Tiley-i tan ita shia liasü aser iba sülen United Cup asayatsü.

Tiley-i pa dak tamang akaba asoshi Nadal-i social media ajanga pelaba lemsatep saka pa shilem agitsü indangbo meshisem.

January ita Brisbane, Adelaide aser Auckland nung ATP asayamung lir aser Nadal-i Australian Open asoshi renemshia item asayamung nung shilem agitsü.

United Cup nungya tebur tematiba jenjang 20 nung alirtem nungi nisung toku aser tetsür tematiba jenjang ter nung alirtem nungi pongu-i shilem agitsü aser

taküma taoba küm takok angur United States dak teimla lir, koba Jessica Pegula aser Taylor Fritz nati anir asayatsü.

Poland ya World No. 2 aser pezüben Grand Slam koka alila Iga Swiatek-i anir asayatsü.

Linük 18 nungi shilem agitsü aluba United Cup asayamung nungya Stefanos Tsitsipas, Casper Ruud, Alexander Zverev, Maria Sakkari, aser Caroline Garcia nungera asayatsü.

Linük balala ya telok trok nung asem-sem lemsatsü aser round-robin format nung asayatsü. Iba asayamung nung tetsür aser tebur melentepa asayatsü aser tarep temeyoktepa asayatsü.

PV Sindhu Denmark Open semi-final tongogo

Odense, Mongputeni/Oct. 20 (Agencies): Hokulbarnü India tsür badminton asayar PV Sindhu-i taoba mapang ama junga asayateta Odense nung World No. 19 Supanida Katethong madak ayongayonga takok ngua Denmark Open Super 750 tournament semi-final tongogo.

Anaben tashi Olympic medal ngur alila Sindhu ya taküm asaya kata nunga takok monguteti arur aser Katethong madak 21-19, 21-12 agi koka hopta ana nung semi-final

anaben tongteta liasü. Tena tsüngta minute 47 asaya liasü.

Taoba hopta Finland nung Arctic Open Super 500 asayadang lai semi-finals tongteta liasü.

Sindhu-i semi-final nung Spain tsür asemen world champion Carolina Marin mesüra Tokyo Olympics nung silver medal angula Chinese Taipei tsür Tai Tzu Ying den asayatsü.

Denmark Open Super 750 tournament nungya lai kanga meranga asaya arur aser mezüng round ana nung lai

World No. 28 Kristy Gilmour aser World No. 7 Gregoria Mariska Tunjung tsükdaktsü.

Thailand tsür Katethong tena asayaba nung Sindhu-i asemen aser Katethong-i anaben koka lir saka Indian Open 2022 aser 2023 nung tamakok ajurua liasü.

Ajisüaka arishi küm 28 tain Sindhu-i Hokulbarnü kanga junga asayateta aibelen kangabo meliasü.

Katethong-i Sindhu ya court müketa net anasa aser teselen asemzudakja liasü.

NAA-i Federation State Technical Official tatidang indang metetdaksü

Dimapur, Mongputeni/October 20 (TYO): Nagaland Athletics-i sangdong ka ajanga Athletic Federation India-i ayongzuka agiba Federation State Technical Official tatidang result October 16 nü sangdongogo, ta metetdaksü.

Tatidang ya India kübok state trok nung September 22 aser 24 nü agi aser North-Eastern state tem atema tatidang centre asütsü asoshi Nagaland shima liasü.

Nagaland nungi official Mhonsao Nnullie aser Purna Konyak na National Federation State Technical Official Examination nung Rank 1 nung takok tajung ngutetogo. Nagaland Athletics

nungi technical officials 17-i State Technical Official tatidang ajangetetogo.

Technical officials temi takok tajung ngutetba ya state aser saisapong loktitentetem atema kanga dang otsüsütsü aser nemadangsü mapa ka lir, ta NA-i ashiba den Nagaland nung aser India kübok tesem balala nungi takok tajung anguba Technical Officials tem nem tenüngsang agüja liasü.

Kasa mapang nung Athletic Federation of India aser Nagaland Olympic Association-i maneni nongita yariba aser tatidang takok ngua agitsüsa lenmang sayuba atema kanga pelaba Nagaland Athletics-i lemsatepogo.

Association-i, technical official, coach aser asayartem ajungkettsü atema takokba tashi inyakdar, ta ashiba den tarutsü nung officials aser coach tem atema iba mala course ya ayongzuka agitsü, ta NA-isa metetdaksü.

Maneni NA-i, asaya meimertem aser tejangrartem dang iba amala course agütsüba nung shilem agitsü ajungshia liasü.

Nagaland Athletics-i ayongzuka Nagaland Senior Open Athletics Championships 2023 November 16 aser 17 nü IG stadium nung asayatsü lir anungji asayamung nung shilem agitsü jangrartemi parnok tenüng züngoksemstü NA-isa metetdaksüogo.

Yemen nungi khaloktsüba missiles tem US...

Gaza nung Israel-i Hamas anema mera agiba US dang meyaritsü Iraqi telungpur telok temi tekumdangtsü shia liasü.

Bodhbarnüa drone kati Syria nung US sepai alidak kongshia nisung kar tera yiru aser ano drone ka khazüka yok.

"Item lendong asoshi telangzüba agütsütsü indang ni mesangdongtsü, saka US aser coalition forces kumzuka ayutsü asoshi nungdakba mera ajak agitsü," ta Brig Ryder-i

ashi. Middle East nung US sepaitem tesem balala nung amenoka lir aser yangji warships, sepai aser tayimtsütem dena lir.

Taoba hopta US-i aircraft carrier ana, marine 2,000 shi aser yaritepba rong tem Middle East-i yoka liasü.

Item ya amshitsü sentong mesüra tebilemba mali, ta White House-i ashir.

Ajisüaka national security

(Tapak 7 nungi...)

interests kumzuka ayutsü asoshi US mitkar indang osettsüset tem ya amshitsü.

Item lendong ya timba Yemen nung aliba Houthi teloki lir ta US-i ashir aser item ya Iran-i nungiter.

Houthis ya 2014 nungi Yemen sorkar den civil war nung lir, shirnok Saudi Arabia-i yarir.

US-i tang tashi Yemen, Iraq aser Syria nung amakba asadanger ta Gen Ryder-i ashi.

MDFA Trophy Osang

Mokokchung, Mongputeni/October 20 (TYO): MDFA Trophy October 20 nü anogo pezünübuba nung mezüngbuba asaya Dare Devils Assam Rifles vs Brotherhood FC aser Tanabuba asaya 16 United Brothers vs NU Lumami ta asayaago.

Tanü mezüngbua asaya Dare Devils Assam Rifles aser Brotherhood FC tsüngda asayaba nung Brotherhood FC teloki goal 7-0 agi Dare Devils Assam Rifles ajemshia akok.

Iba asaya nung Brotherhood FC telok nungi jersey no 7 Tarepnungsangi minute 47,55 aser 89 ta nung goal asem metsüokja Hat-trick ajanzüktet, iba den ano jersey no 15 Imkongnungkumi minute

43 buba nung goal ka Jersey no 9 Menjur-i minute 49 aser minute 74 nung gaol ana yok

aser tatemsa jersey no 11 Tajungsang-i minute 92 buba nung gaol ka yoka item goal tenet jagi Brotherhood FC teloki goal 7-0 agi Dare Devils Assam Rifles ajemshia kokogo.

Tanabuba asaya 16 United Brothers aser NU Lumami tsüngda asayaba nung NU Lumami teloki goal 4-0 agia ayongayonga dang koka liasü.

Lumami teloki nungi jersey no 7 M.Phoawang, jersey no 11 Neille Nagi, jersey no 7 M.Phoawang aser jersey no 18 par asmi minute 6,20,50 aser 52 ta nung item goal pezüji yoka NU Lumami teloki goal 4-0 agia ayongayonga dang 16 United Brothers telok koka liasü.

21-10-2023 MDFA Fixture
12:00PM - KSR Team Vs Lomuden FC
2:00PM - Zonipang SA Vs Sports Society Soyim

Sultan of Johor Cup atema tebur junior team sangdongogo



Mongputeni/October 20, 2023 (Agencies): Sultan of Johor Cup atema Hockey India-i India junior team nung asayar 20 tenüng sangdongogo. Iba asayamung ya October 27 nungi November 4 tashi Malaysia nung asayatsü.

India team ya Uttam Singh lenisüba nung asayatsü aser vice captain asütsü atema Rajinder Singh shimogo, ta Hockey India-i metetdaksü.

11buba Sultan of Johor Cup nung teti ama team trok masü saka team ti asayatsü.

Iba asayamung nung India team Pool B nung Malaysia, Pakistan, aser New Zealand den ata lir aser Pool A nung Germany, Australia, South Africa, aser Great Britain lir.

"Asayar shimba committee-i taoba mapang asayaba asayamung ajak asadanger 11buba Sultan of Johor Cup nung toktepa takok angutsü atema team kanga liromedema shimogo," ta coach CR Kumar-i sangdong ka ajanga metetdaksü.

"Opponent tem dang nungi tajungba asayatetsüsa sempet aliba aser line yongtsü nung penetrative pass tem asayatetba asayartem nem maongka agütsütsü aser parnok ajungmesotsü asoshi onoki inyaktepogo.

"Iba asayamung ya FIH Hockey Men's Junior World

Cup 2023 asayatsü aliba team trok asadanga angatetsü asoshi maongka tajung ka asütsü aser iba den December ita Kuala Lumpur nung tsüngsang koma asütsü iba indang angatetsü asoshi maongka agütsütsü," ta paisa ashi.

Team nung goalkeeper Mohith H S aser Ranvijay Singh Yadav na anisema lir aser defence nung Amandeep Lakra, Rohit, Sunil Jojo, Sukhvinder, Amir Ali, aser Yogember Rawat nung densema lir.

Maneni midfield nung Poovanna C B, Vishnukant Singh, Rajinder Singh, Amandeep, Sunit Lakra, aser Abdul Ahad nung amala asayar tajungtem asayaba angutsü. Forward nung Uttam Singh, Arun Sahani, Aditya Lalage, Angad Bir Singh, Gurjot Singh, aser Sathish B nung densema lir.

Asayamung atema India team:

Goalkeepers - Mohith H S, Ranvijay Singh Yadav
Defenders - Amandeep Lakra, Rohit, Sunil Jojo, Sukhvinder, Amir Ali, Yogember Rawat
Midfielders - Vishnukant Singh, Poovanna C B, Rajinder Singh, Amandeep, Sunit Lakra, Abdul Ahad
Forwards - Uttam Singh, Arun Sahani, Aditya Lalage, Angad Bir Singh, Gurjot Singh, Sathish B.

BILEMDANGANG

"Ajak samayonga tarutsü tia bo mesamar."